

PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEDUA
PARLIMEN KEEMPAT BELAS

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 10 JULAI 2019 (RABU)

SOALAN

Tuan Chang Lih Kang [Tanjong Malim] minta MENTERI INDUSTRI UTAMA menyatakan langkah-langkah dan pencapaian yang dicapai oleh Kementerian dalam menghadapi kempen anti-minyak sawit di Eropah.

JAWAPAN

Tuan Yang Di-Pertua,

Izinkan saya menjawab soalan ini bersekali dengan soalan yang telah dibangkitkan oleh **Yang Berhormat Sipitang pada 10 Julai 2019** dan **Yang Berhormat Sarikei pada 16 Julai 2019** yang juga menyentuh tentang perkara yang sama.

Tuan Yang Di-Pertua,

Untuk makluman, pada Mei 2019 yang lalu, Kesatuan Eropah telah pun meluluskan *Delegated Regulation* iaitu dokumen pelengkap kepada *European Union Renewable Energy Directive II* (EU RED II) yang dijangka akan memberi kesan negatif kepada industri sawit negara terutama sekali sebagai sumber biobahan api di Kesatuan Eropah.

Dalam hubungan ini, Kementerian sedang merangka beberapa strategi dan merancang untuk membuat pertimbangan untuk mengambil

tindakan undang-undang di bawah *dispute settlement mechanism* melalui Pertubuhan Perdagangan Dunia (*World Trade Organization – WTO*) terhadap Kesatuan Eropah yang didapati telah melanggar prinsip-prinsip WTO. Pada masa ini, Kementerian sedang bekerjasama Jabatan Peguam Negara dan Kementerian Perdagangan Antarabangsa dan Industri (MITI) serta lain-lain Kementerian yang berkaitan bagi mendapatkan pandangan dalam menangani isu tersebut melalui WTO.

Tuan Yang Di-Pertua,

Dalam menghadapi situasi yang mencabar ini juga, Kerajaan akan terus secara konsisten melaksanakan perkara berikut:

(i) mengkritik sekeras-kerasnya langkah yang telah diambil oleh Kesatuan Eropah memandangkan ia dilihat sebagai langkah diskriminasi dan tidak adil terhadap industri sawit negara;

(ii) bekerjasama melalui *Council of Palm Oil Producing Countries (CPOPC)* untuk merangka usaha-usaha dan aktiviti-aktiviti bagi menangkis sebarang usaha untuk menyekat eksport minyak sawit dan produk-produk sawit;

(iii) bekerjasama negara-negara anggota ASEAN dalam menyuarakan bantahan terhadap sebarang langkah diskriminasi terhadap ekonomi dan perdagangan serantau sepertimana yang telah dilaksanakan dalam Mesyuarat Dua Hala di antara ASEAN dan Kesatuan Eropah di Brussels, Belgium pada 21 hingga 23 Januari 2019. Dalam mesyuarat tersebut, ASEAN telah memutuskan untuk menangguhkan agenda penaiktarafan hubungan dialog ASEAN-EU ke peringkat Kerjasama Strategik (*Strategic Partnership*) pada satu tarikh yang akan datang; dan

(iv) Kementerian juga telah berulang kali menyuarakan pendirian dan bantahan negara melalui misi-misi Kementerian dan juga surat bantahan daripada YAB Perdana Menteri dan saya sebagai Menteri Industri Utama kepada ketua-ketua negara anggota Kesatuan Eropah yang berpengaruh berhubung *Delegated Regulation* di bawah EU RED II tersebut yang dilihat akan mendiskriminasi industri sawit negara.

SOALAN NO : 9

(v) Kementerian juga telah membuat edaran risalah mengenai kebaikan minyak sawit dalam Bahasa Inggeris, Bahasa Perancis dan Bahasa Jerman di pejabat-pejabat Kedutaan Malaysia dan Pejabat Tourism Malaysia yang terpilih di seluruh Eropah bagi tujuan mempromosikan dan menghebahkan mengenai kebaikan minyak sawit.

Selain itu, kerjasama erat telah dijalinan dengan Menteri Luar Negeri, Menteri Industri Utama, Menteri Perdagangan Antarabangsa dan Industri, Menteri Air, Tanah dan Sumber Asli, dan Menteri Tenaga, Sains, Teknologi, Alam Sekitar & Perubahan Iklim dalam menangani isu diskriminasi terhadap industri sawit negara. Kelima-lima Menteri telah bersetuju untuk bersama-sama mempertahankan industri sawit negara di setiap persidangan atau program yang berkaitan sama ada di dalam atau luar negara khususnya di negara Kesatuan Eropah.

Sekian, terima kasih.